

**Ubutumwa Bikira Mariya yahaye Valentine NYIRAMUKIZA
tariki ya 05/11/2020, saa cyenda na mirongo itatu za mu
gitondo (3h30).**

Bikira Mariya:

Nyiramukiza mwana wanjye nkunda, ntega amatwi nkubwire ikinzanye muri aka kanya, ngo ngutume ku basenga n'abemera bose.

Valentine:

Karame Mama, ndi hano ndi igikoresho cyawe, ngo untume aho ushaka no kubo ushaka.

Bikira Mariya:

Bana banjye ndabakunda

Bana banjye ndabakunda

Bana banjye ndabakunda .

Dore ikinzanye kihutirwa, mwana wanjye, kandi kimbabaje.

- Bana banjye nimusenge cyane, nta buryarya. Mushyire mu bikorwa isengesho ryanyu, musabire isi yose.
- Mushikame musenge cyane mushyizemo umwete musabira igihugu na Kiliziya by'u Rwanda, kuko bigiye kugira amateka atarigeze abaho mu gihe cyashize.

Ndashaka kubabwira ko Kiliziya igiye kubona umuyobozi mushya ukomeye mu mateka yayo; n'ibukuru hejuru bizagirwa bire bire, n'ibindi nk'ibyoye.

Ibyo byishimo byanyu muzabivange no gusenga cyane kuko aho icyiza kiri, na shitani iraza ikahavuyanga ibintu n'abantu, kugira ngo ibyo bakora bibe bibi bakorwe n'isoni.

Ni yo mpamvu mbahamagarira gusenga byihutirwa.

Musenge musabira Kiliziya kuko yugarijwe na byinshi, itotezwa, ubwoba, urukundo ruke, kutavugisha ukuri, akarengane no guha agaciro gake abihayimana bamwe na bamwe.

Ibyo byose byihishe inyuma ya kino cyorezo cyacyiye isi umugongo n'umuborogo : coronavirus.

Kiriziya ifite inshingano ikomeye cyane itaratunganya, iyireba kandi yihutirwa, izi neza ikayirengagiza.

Nidakosorwa ngo yubahirizwe uko bikwiye, amahano ntazashira.

Kiriziya izaba yugarijwe na byinshi, birimo gukorera ijisho ry'ab'isi.

- Musenge kugira ngo aho nigaragarije i Kibeho hafungurwe, kuko ni ho hazazanira Kiriziya n'igihugu amahoro n'urumuri rwa Roho Mutagatifu, kubera amasengesho azahavugirwa muri bino bihe turimo bitoroshye na gato bana banjye !

- Bana banjye nongeye gusubiramo aya magambo, ngira nti:
 - Ni mudapfukama ngo musenge mubishyizeho umwete, ntaburyarya no kwikunda bibarimo, hazongera hameneke amaraso menshi mu Rwanda no mu bihugu birukikije. Uzaba yarakurikije ibyo twababwiye byose, agasenga agafasha abandi gusobanukirwa n'ukuri, azarokoka muri iyo nkubiri izaba yugarije igihugu, nibihugu byanyu.
 - Bihayimana ndabasabye, nimuhaguruke muhamagarire abakristu gusenga bya nyabyo, kuko ibihe biri imbere bitoroshye na gato. Ndashaka kuvuga ababakuriye: abasenyeli, abapadiri n'abandi bihayimana b'ingeri zose. Mwe mwageze i Kibeho, nzababaza ibyo nababwiye ntimwabyitaho, ibyo nasabye byose murabyirengagiza; kandi murabizi neza ko bitatunganyijwe uko bikwiye kugeza ubu.
 - Iyo muza kumva nta muntu n'umwe wari gupfira muri za Kiliziya!
 - Iyo muza kumva ntabwo barikubahuka gukorera amarorerwa yabaye muri za Kiliziya, bubahuka gukinisha umubiri n'amaraso by'Umwana wanjye Yezu Kristu, bakoreyeho ubufindo nka ya kanzu ye igihe yendaga kubapfira.
 - Ubwo se mwumva nk'Umubyeyi waje kubaburira no kubateguza ntimunyumve, nakora iki kindi ?
 - Ese mwigeze mwibaza ako kababaro mwanteye n'Umwana wanjye Yezu Kristu ? Cyangwa murireba gusa?
 - Ibyo byose Kiliziya yari ibizi, ariko ntiyahamagarira abantu gusengana urukundo; bamagana abo mbatumyeho.
 - Nongeye gusaba Kiliziya ngo ihaguruke bya nyabyo, ishishikarize abakristu gushyira hamwe, bagasenga nta buryarya kandi bafite urukundo ruhamye rw'abakristu. Urukundo rukubiye mu kubabarira, urukundo rukubiye mukwiyunga, gusabana basabana imbabazi nyazo zivuye ku mutima w'umukristu nyawe; batarebana ibijisho, kuko ni yo nzira nyayo yo gukora no gutsinda shitani yigabije imitima y'abantu bamwe na bamwe. **Ibi mvuga ndabizi, kandi ndabibona rwose.**
 - Iby'isi mubirekere ab'isi, maze mukore ubutumwa bwanyu muhamagarirwa n'Imana.
 - Mwitinya ibizashira ahubwo nimutinye ijisho ry'Imana.

Mwana wanjye ndekeye aho ni ah'ubutaha.

Ngaho vuga aya masengesho nguhe umugisha, ukomeze amasengesho yawe aho warugereje.

Isengesho ryo gusabira abatwanga:

Mana y'urukundo n'amahoro, abatwanga bose ubakize ibyaha byabo byose, ariko kandi natwe uturinde imitego yabo Ukomeje, ku bwa Yezu Kristu Umwami wacu. Amina.

Isengesho ryo gusabira Kiliziya:

Yezu wanjye, ndagusabye ngo wongerere Kiliziya yawe urumuri n'urukundo bya Roho Mutagatifu. Uhe abasaserdoti bawe imbaraga zizatuma bakugarurira imitima yahabye yose. Duhe abasaserdoti batagatifu, kandi ubakomezemwo ubwo butungane.

Wowe Musaserdoti mukuru w'Imana, boherereze impuhwe zawe zibagume iruhande kandi zibarinde imitego yose bahura na yo iganisha umuriro w'iteka. Mukiza mwiza, izo mpuhwe z'Imana nizigane kuri roho ya buri musaserdoti, maze zimurinde icyashobora kwanduza ubutungane bwe, kuko uri Umushoborabyose!

Nguhaye umugisha wa Kibyeyi mwana wanjye.

Kw'izina ry'Imana Data na Mwana na Roho Mutagatifu.

Amina.

Uramuke mwana wanjye.

Valentine:

Urakoze cyane, Mama.

Uramuke.